

棗強縣志卷第十

陽湖楊元錫

同纂

蕭縣任銜蕙

學校志

學宮

縣學在縣治東中爲大成殿九間露臺前有栢樹九槐
樹一碑記五東西兩廡各七間前爲戟門三間戟門左
右爲東西角門戟門前爲泮池有橋又前爲櫺星門三
楹又前左右曰金聲玉振二門各有下馬牌一通又前
爲照壁繚垣周焉

銜蕙謹案舊志棗邑儒學於金天會十年創立明洪

武九年知縣李源清廣拓永樂二年知縣趙禮重修
成化十七年知縣史英重修立提調教官科貢題名
碑於學內教諭潘偉撰記二十三年知縣應傑重修
始鑿泮池宏治八年知縣張環修大成殿三間東西
廡各五間戟門三間櫺星門三座明倫堂五間進德
修業齋各五間官師宅三所今併爲二皆在堂西撰記立
石嘉靖四年知縣陳言重修明倫堂鑿井置亭久少廢
卿甘陵孫緒撰記十年更文廟爲

先師廟門爲廟門易封號撤像題木主十四年建敬一
亭立敬一箴及視聽言動心五箴石於內三十七年
教諭范紳以學宮舊植槐樹不榮悉易以栢訓導方

麟撰記隆慶二年知縣王淑陵建更衣所宰牲所各

三間於學東

今廢

學東復開夾道南爲大門北建敬敷

文教坊與西夾道樂育英才坊相對學之大門東建

攀龍坊書歷科進士姓名西建附鳳坊書歷科舉人

姓名

今俱廢

萬曆十七年知縣石岩重修四十三年知

縣鄭陞重修正殿知縣王鶴齡以工多未竟乃濬泮

池重修櫺星門更衣所於月臺櫺星門外置柵欄教

諭胡來順撰二記

國朝順治十四年知縣張鳳起何之圖重修正殿兩廡
吏部侍郎梁清寬撰記康熙三十六年知縣王友直
拓外垣建戟門爲三又東西各建角門乾隆十七年

知縣單作哲重修櫺星門於照壁內改建東西二門
東曰金聲西曰玉振學東夾道建南北二門南曰成
賢北曰毓秀三十七年 先君子仕此捐俸重修作
文記之迄今又三十餘年矣蓋棗學創修節次於是
略可考云

謹案學記古之教者家有塾黨有庠術有序國有學
周禮州長春秋以禮會民而射於州序鄭註序州黨
之學也前漢書食貨志曰序以明教庠以行禮而視
化焉漢文翁爲蜀郡守仁愛教化修起學官於成都
市中招下縣子弟以爲學官弟子繇是大化蜀地學
於京師者比齊魯焉至武帝時乃令天下郡國皆立

學校官自文翁爲之始也元帝時郡國置五經百石
卒史平帝元始三年立學官郡國曰學邑侯國曰校
校學置經師一人班固東都賦曰四海之內學校如
林是也後魏獻文帝天安初立鄉學郡置博士二人
助教二人學生六十人郡縣學始於此矣唐武德七
年詔諸州縣及鄉並令置學宋仁宗卽位之初命藩
輔皆得立學其後諸旁郡多願立學者詔悉可之由
是學校之設遍天下安定先生胡瑗自慶厯中教學
蘇湖二十餘年束脩弟子前後以數千計有經義齋
擇䟽通有器局者居之有治事齋人各治一事又兼
一事加邊防水利之類故爲政多適於世用若老於

吏事者歐陽永叔詩云吳興先生富道德詵詵子弟
皆賢才王介甫詩云先收先生作梁柱以次收拾桷
與榱慶厯四年詔州縣皆立學於是取先生之法爲
學著爲令焉元因宋制置諸路州學官前明天下府
州縣衛皆建儒學明史選舉志云無地而不設之學
無人而不納之教矣

國朝尊崇

聖道薄海內外儒教振興况棗邑地隸

京畿學校之設尤當廣其激勸之道不特士習日趨於
正學而民風亦日進於敦龐矣是在良有司與司教
者加意焉

大成殿正中奉

至聖先師孔子位南面恭懸

聖祖仁皇帝御書萬世師表匾額

世宗憲皇帝御書生民未有匾額

高宗純皇帝御書與天地參匾額

皇上御書聖集大成匾額

謹案古者釋奠釋菜詳於禮經此成周祀舜禹湯文
之禮也史記漢高祖十二年過魯以太牢祀孔子此
尊聖之始平帝元始初追謚孔子曰褒成宣尼公光
武建武五年幸魯使大司空祠孔子十月營建太學
靈帝光和元年置鴻都門學畫孔子及七十二弟子

像魏正始七年以太牢祀孔子于辟雍以顏淵配齊武帝永明三年釋奠用元嘉故事設軒懸之樂六佾之舞牲牢器用悉依上公隋制國子寺每歲四仲月上丁釋奠大業中以孔子爲先聖顏回爲先師唐武德中以周公爲先聖孔子配享詔國子學立周公孔子廟各一所貞觀二年停祭周公升孔子爲先聖以顏回配乾封元年追贈孔子爲太師天授元年封孔子爲隆道公開元二十七年詔以夫子旣稱先聖可追謚爲文宣王令三公持節冊命其後嗣褒聖侯改封嗣文宣王昔周公南面夫子西坐今位旣有殊豈宜依舊宜補其墜典永作成式其兩京國子監及天

下諸州夫子南面坐十哲等東西行列侍宋初修先
聖及亞聖十哲塑像七十二賢及先儒二十一人皆
畫像於東西廊之板壁太祖親撰先聖及亞聖贊從
祀賢哲先儒並命當時文臣爲之贊大中祥符五年
詔謚先聖爲至聖文宣王天禧元年以文宣王四十
六代孫聖佑襲封文宣公至和二年詔封孔子後爲
衍聖公神宗崇寧四年八月詔從國子司業蔣靜之
請加冕十二旒服九章其執圭立戟乞並從王者制
度紹興十年詔與大社大稷並爲大祀元武宗至大
元年秋七月詔加號先聖曰大成至聖文宣王明洪
武十五年新建太學成帝親詣釋奠又詔天下通祀

孔子并頒釋奠儀注每歲春秋仲月上丁日行事正
統三年禁天下祀孔子於釋老宮成化十二年加樂
舞爲八佾籩豆各十二宏治九年加樂舞爲七十二
人如天子之制嘉靖九年從張璁議撤塑像立木主
去王號題至聖先師孔子樂舞六佾大成殿爲先師
廟改太祀爲中祀我

朝順治二年定每歲春秋仲月上丁日府州縣各行釋
奠禮與太學儀同典禮隆備至此無以復加矣

四配東位

復聖顏子

名回字子淵魯人魏正始七年配享隋稱先
師唐總章元年贈太子少師配享開元八年

稱亞聖二十七年贈兗公宋大中祥符元年追封兗
國公元至順元年加封兗國復聖公明嘉靖九年改

稱復聖
顏子

述聖子思子

名伋字子思宋崇寧元年追封沂水侯大觀二年從祀咸淳三年封沂國公配享元

至順元年加封沂國述聖公明
嘉靖九年改稱述聖子思子

四配西位

宗聖曾子

名參字子輿魯南武城人唐總章元年贈太子少保配享開元八年列於十哲之次二十

七年贈鄆伯宋大中祥符元年追封瑯邱侯政和元

年改封武城侯咸淳三年封鄆國公配享元至順元

靖九年改稱宗聖曾子

年加封鄆國宗聖公明嘉

靖九年改稱亞聖孟子

十二哲東位

先賢閔子

名損字子騫魯人唐開元八年從祀二十七年贈費侯宋大中祥符元年追封琅瑯公咸

淳三年封費國公明
嘉靖九年改稱先賢

先賢冉子
名雍字仲弓伯牛之宗族魯人唐開元中從祀贈薛侯宋封下邳公加封薛國公

先賢端木子
名賜字子貢衛人唐開元中從祀贈黎侯宋封黎陽公加封黎國公

先賢仲子
名由字子路魯卞人唐開元中從祀贈衛侯宋封河內公加封衛國公

先賢卜子
名商字子夏衛人唐貞觀二十一年從祀開元中贈魏侯宋封河東公加封魏國公

先賢有子
名若字子有魯人唐從祀在七十子之列贈卞伯宋封平陰侯明改今稱國朝乾隆三

年升配十哲之次

十二哲西位

先賢冉子
名耕字伯牛魯人唐開元中從祀贈鄆侯宋封東平公加封鄆國公

先賢宰子
名予字子我魯人唐從祀贈齊侯宋封臨淄公加封齊國公

先賢冉子
名求字子有仲弓之族唐從祀贈徐侯宋封彭城公加封徐國公

先賢言子

名偃字子游吳人唐從祀贈吳侯宋封丹陽公加封吳國公

先賢顓孫子

名師字子張陳人唐從祀在七十子之列第二贈陳伯宋封宛邱侯後改潁川侯咸

淳三年封陳國公升十哲位

先賢朱子

名熹字元晦後改仲晦婺源人宋紹興十八年進士孝宗光宗時歷知南康軍漳潭諸州

寧宗時除煥章閣待制侍講諡曰文理宗時贈太師追封信國公改封徽國公從祀明崇禎十五年改稱

先賢

國朝康熙五十

一年升配十哲之次

謹案文廟配位唐以前惟顏子一人北齊有拜孔揖

顏之禮貞觀初定議以顏子配享二十一年詔以左

邱明卜子夏公羊高穀梁赤伏勝高堂生戴聖毛萇

孔安國劉向鄭眾杜子春馬融盧植鄭康成服子慎

何休王肅王輔嗣杜元凱范甯賈逵等二十二人爲

配而七十子不與焉總章元年以顏曾並配至開元八年始以顏子閔子騫冉伯牛仲弓宰我子貢冉有季路子游子夏爲十哲曾子居十哲之次塑坐像配享因圖畫七十子於廟壁二十七年贈顏子爲公閔子以下九人爲侯曾子以下七十子爲伯後唐長興

三年設七十二賢豆爵陳醢醢諸物以祭宋真宗大

中祥符元年進十哲爲公會子以下七十子爲侯左

邱明以下二十一人爲伯

子夏已入十哲故云二十一人

神宗元豐

六年封孟子爲公七年配享大觀二年詔躋子思從祀度宗咸淳三年以顏曾思孟爲四配進顓孫子爲十哲元文宗至順元年加顏子復聖曾子宗聖子思

述聖孟子亞聖明嘉靖九年四配稱復聖顏子宗聖
曾子述聖子思子亞聖孟子十哲以下凡及門弟子
皆稱先賢某子左邱明以下皆稱先儒某子並罷公
侯伯之稱

國朝康熙五十一年升朱子入廟配享乾隆三年升有
子入東位卜子之次移朱子於西位顓孫子之次

東廡從祀

先賢三十九位
先儒二十三位

先賢蘧瑗

字伯玉衛人唐開元從祀贈衛伯宋加內黃
侯明嘉靖九年改祀於鄉賢雍正二年復祀

先賢澹臺滅明

字子羽武城人唐從祀
贈江伯宋加金鄉侯

先賢原憲

字子思宋人唐從祀
贈原伯宋加任城侯

先賢南宮适

字子容魯人家語作南宮韜唐從祀贈邾
伯宋加龔邱侯政和元年改封汶陽侯

先賢商瞿

字子木魯人唐從祀
贈蒙伯宋加須昌侯

先賢漆雕開

字子開家語字子若蔡人唐
從祀贈滕伯宋加平輿侯

先賢司馬耕

字子牛宋人唐從祀
宋加楚邱侯改封雒陽侯

先賢梁鱣

字叔魚齊人唐從祀
贈梁伯宋加千乘侯

先賢冉孺

家語作儒字子魯一作子魚魯
人唐從祀贈紀伯宋加臨沂侯

先賢伯虔

字子析家語字子楷魯人唐
從祀贈聊伯宋加沐陽侯

先賢冉季

字子產魯人唐從祀
東平伯宋加諸城侯

先賢漆雕徒父

字子有又字子期家語作漆雕從字子
文蔡人唐從祀贈須句伯宋加高苑侯

先賢漆雕哆

字子斂魯人家語作漆雕侈唐
從祀贈武城伯宋加濮陽侯

先賢公西赤

字子華魯人唐從祀
贈郛伯宋加鉅野侯

先賢任不齊

字子選楚人唐從祀
任城伯宋加當陽侯